

## 棋聖聶衛平訪港賽橋牌

【本報訊】圍棋大師轉行打橋牌？「棋聖」聶衛平（見下圖）昨晚現身名人橋牌邀請賽，與一眾政商界名人及橋牌冠軍切磋技藝，並與隊友合作一舉奪魁。聶衛平是橋牌「發燒友」，已有逾四十年「牌齡」，他今日還將與世界各地橋牌高手在「香港城市橋牌錦標賽」中一較高下。

橋牌的影響力廣泛，不少知名人士都是這項運動的愛好者。三十二名政商界名人和橋牌世界級大師雲集，參加昨晚舉行的「香港城市橋牌錦標賽」前哨戰「中國金融租賃名人橋牌邀請賽」，中聯辦協調部部長沈沖擔任頒獎嘉賓。


圍棋九段、有「棋聖」之稱的聶衛平專程來港參賽，他和中國橋牌協會副主席陳勝洪、漫畫家蔡志忠、香港橋牌委員梁康成的組合獲得冠軍。聶衛平說，打橋牌是自己最大的業餘愛好，只要有空就打。他一九六六年開始接觸橋牌，已有四十四年「牌齡」。被問到是否有信心贏得比賽時，他笑說，由於高手眾多，要看運氣，「不過我的運氣一向很好。」

亞軍組合成員之一的政府土木工程拓展署署長蔡新榮，年年都參加比賽，他透露自己從中學已開始學打橋牌，但由於近年工作繁忙，打的機會越來越少，所以很珍惜這一年一度「以牌會友」的機會。他笑說，橋牌是一個講邏輯思維的益智遊戲，好考腦力，亦很講究合作，「一旦學識，好易上癮」。

全國政協委員蔡國雄今日亦將參加城市橋牌錦標賽，拍檔實力強勁，包括世界橋牌錦標賽冠軍福中、全國冠軍石森等。但作為上一屆名人邀請賽冠軍，他說，參加比賽「唔講輸贏，講交流」。

「香港城市橋牌錦標賽」今日開始一連五日舉行，至今已舉辦三十年，今屆有來自世界二十多個城市共四十支隊伍參賽，香港橋牌協會主席單偉彪表示，想藉此推廣橋牌，讓更多人認識這項運動。





## 橋牌名人賽 高官迎戰世界冠軍

政壇有唔少橋牌迷，所以每年一度嘅「橋牌名人邀請賽」，全場都係星光熠熠。嗰日 Emily 就喺現場見到土木工程拓展署長蔡新榮（右），佢同有「橋牌王」之稱嘅世界橋牌錦標賽冠軍福中（中），加埋香港大學副校長譚廣亨（左），齊齊打橋牌，唔知最後邊個稱王呢？

（朱永倫攝）

# 橋牌賽奪冠蔡志忠牙擦有理



■ 漫畫家蔡志忠（左）同中國「棋聖」聶衛平合力贏得名人橋牌賽冠軍。

名人圈中有唔少橋牌高手，「中國金融租賃名人橋牌邀請賽」前晚喺尖東富豪酒店舉行，吸引三十多人參賽，激戰三粒鐘後，由中國「棋聖」聶衛平及著名漫畫家蔡志忠率領嘅隊伍奪冠。

## 聶衛平無興趣移居香港

打咗三十一年橋牌嘅蔡志忠賽後牙擦，話贏得唔辛苦，更大晒戰績：「我至今攞咗一百二十一個橋牌賽冠軍及亞軍，但我唔鍾意攞亞軍，多數都攞冠軍。」尋日蔡氏獎牌榜上，又增添一面金牌，抵佢牙擦。

聶衛平嘅「牌齡」短啲，只有十年，舊年佢冇參賽，今年一出場就捧盃。卓妮問佢會否移民來港大展拳腳，聶生頭擰擰話：「我有興趣，你千祈唔好寫我想移民嚟香港呀。」難怪當卓妮講起政府有個輸入內地優才計劃，佢顯得茫無頭緒，話冇聽過啲。

吉利汽車控股有限公司行政總裁桂生悅前晚都嚟打牌，原來佢玩咗橋牌十年，去年仲係呢個比賽香港公開組冠軍添，佢笑言，打橋牌有助鍛煉腦筋，對做生意有幫助啲。



■ 吉利汽車行政總裁桂生悅原來係超級橋牌迷。（徐家浩攝）



## 蔡志忠夥「棋聖」橋牌奪冠

中港台橋牌高手喺香港鬥一番，三十多名參賽者激戰三粒鐘後，由中國「棋聖」聶衛平及著名漫畫家蔡志忠率領嘅隊伍奪冠。打咗三十一年橋牌嘅蔡志忠賽後牙擦擦，話贏得唔辛苦，更大晒戰績：「我至今攞咗一百二十一個橋牌賽冠軍及亞軍，但我唔鍾意攞亞軍，多數攞冠軍。」尋日蔡氏獎牌榜上，又增添一面金牌，抵佢牙擦。

呢班名人前晚參加喺尖東富豪酒店舉行嘅「中國金融租賃名人橋牌邀請賽」，參賽者中，聶衛平嘅「牌齡」較短，只有十年，舊年佢冇參賽，今年一出場就捧盃。我哋問佢會唔會移居本港、大展拳腳，聶生擰擰頭話：「我有興趣，你千祈唔好寫我想移民嚟香港呀。」

吉利汽車控股有限公司行政總裁桂生悅前晚都嚟打牌，原來佢玩咗橋牌十年，去年仲係呢個比賽香港公開組冠軍添，佢笑言打橋牌有助鍛煉腦筋，對做生意有幫助啲。



◆漫畫家蔡志忠(左)同中國「棋聖」聶衛平合力贏得名人橋牌賽冠軍。

# 蔡國雄啤牌腕錶獨一無二

香港橋牌協會名譽會長、中國金融租賃集團主席蔡國雄打咗四十五年橋牌，對於呢樣智力運動十分着迷。

## 國產錶芯 瑞士調校


早前蔡老闆又慷慨贊助名人橋牌邀請賽，佢戴住一隻錶面好似啤牌圖案嘅陀飛輪靚錶滿場飛，造型十分搶眼。原來隻錶係佢自己設計，再搵瑞

士錶廠St. Gallen度身訂造，全球獨一無二㗎！蔡老闆話，隻錶嘅錶芯來自國產名牌錶廠天津海鷗，由於國產陀飛輪仲未達到瑞士頂尖品牌嘅水準，所以特登送到瑞士錶廠將時間嘅準確性調校到世界級。至於用貝母造成嘅錶面係隻錶嘅靈魂，事關圖案似足啤牌，襯晒蔡老闆愛橋牌嘅嗜好。

蔡老闆提起隻錶就愈講愈投入，佢介紹錶面中間偏左位置有個細小白點，當隻錶需要上鍊時，白點會變成紅點，提醒佢嘅主人上鍊啦！內外兼備嘅靚錶叫價幾多？蔡老闆好鬼馬咁笑稱：「只要五萬蚊，平到你唔信！」梗係啦！負責幫佢製造嘅瑞士錶廠St. Gallen嘅老細係佢老友龍家祥嘛！當日都在場嘅龍生笑謂，蔡老闆係愛錶之人，梗要支持佢。



■ 蔡國雄（右）同龍家祥同是橋牌發燒友。（徐家浩攝）



■ 蔡國雄設計嘅St. Gallen陀飛輪。

# 蔡國雄親設計啤牌陀飛輪

做得香港橋牌協會名譽會長嘅中國金融租賃集團主席蔡國雄，當然對呢種智力牌局好着迷，佢已經打咗四十五年橋牌喇！蔡老闆早前又慷慨贊助名人橋牌邀請賽，見佢戴住一隻錶面好似啤牌圖案嘅陀飛輪錶滿場飛，原來隻錶係佢自己設計，再搵瑞士錶廠St. Gallen度身訂造，全球獨一無二㗎！

蔡老闆話隻錶嘅錶芯嚟自國產名牌錶廠天津海鷗，由於國產陀飛輪仲未達到瑞士頂尖品牌嘅水準，所以特登送到瑞士錶廠將時間嘅準確性調校到世界級。至於用貝母做成嘅錶面係隻錶嘅靈魂，事關個圖案似足啤牌，襯晒蔡老闆喜愛橋牌呢個嗜好。

呢隻內外在美兼備嘅靚錶要幾錢呢？佢好鬼馬咁笑住話：「只要五萬蚊，平到你唔信！」梗係啦！負責幫佢

製造嘅瑞士錶廠St. Gallen嘅老細係佢老友龍家祥嘛！龍家祥仲話蔡老闆係愛錶之人，梗要支持佢。



◆ 上圖：蔡國雄（右）同老友龍家祥（左）都係橋牌發燒友。左圖為蔡國雄設計嘅St. Gallen陀飛輪錶。